

Հանան և կապառալուեն, իսկ պետական հարկ վճարում են.—

Մարդագլուխ 2 դռան. Կովին 6 դռան.
Ոչխարին 1 » Այծին 10 շահի.

Հողը հերկում են արօրով: Ցանում են ցորեն, գարի, հաճար, կտաւահատ, արևածաղիկ, եօնջա, գետնախնձոր (քիչ), վարունգ, ոսպ, թրև և այլն:

Գիւղն ունի երեք եկեղեցի՝ Ս. Ամենափրկչեան (հիմնւած է 1608 թւին), որ մի բաւական գեղեցիկ շէնք է, Ս. Թադէոս և Ս. Գրիգոր Լուսաւորիչ: Այստեղ կրթական գործն այնքան էլ մխիթարական չէ. գիւղի արևմտեան կողմը, Փոքրիկ չալի կողքին փռւած է «Յովնանեան» ազգային դպրոցը, որ հիմնւել է 1904 թւին, օժանդակութեամբ տ. Վառվառէ Քանանեանի և Եզնիկ ծ, վ. Երկարակեցեանի ջանքերով. դա մի յարկանի, երեք կողմը պարտէզով շրջապատւած գեղեցիկ մի շինութիւն է, որի երկարութիւնն է 42 գաղ և լայնութիւնը 18, իսկ պարիսպը քառակուսի է. իւրաքանչիւր կողմը 60 գաղ: Բաղկացած է 11 օդասուն սենեակներից—մի գրադարանով, ուր կան մօտ 140 կտոր հայերէն գրքեր և պարբերական հրատարակութիւններ: Արևմտեան պարսպի ուղղութեամբ, դրսի դրան աջ թևի վրայ բարձրանում է նաև մի երկյարկանի շէնք դպրոցի պէտքերի համար:

Դպրոցի տիպն անորոշ է, որտեղ յաճախում են ձմեռը 200-ից աւելի երկսեռ աշակերտներ, իսկ գարնան վերջերը և ամառն աշակերտների թիւը հետզհետէ քչանում է երկրագործական աշխատանքների պատճառով: Այս տարի դրպրոցը բաղկացած էր երկու բաժանմունքից և ունէր 1 ուսուցիչ, 1 ուսուցչուհի, որոնք աւանդում էին հայերէն, հայոց պատմութիւն, թւաբանութիւն, պարսկերէն, գրութիւն, կրօն, արտագրութիւն և ժամագիրք: Սակայն դպրոցում շատ թերութիւններ կան. նստարանները անյարմար են աշակերտներին. դասերի տեղութիւնը կատարւում է առանց ժամացոյցի, երբեմն շատ երկար է, 6—7—8 տարեկաններին